

Wonnemonat Mai

Merr kann redde mett wem merr will, allsfort werrd iwwer de Monat Mai geschennd. Unn wie der sich präsendiern dut hott merr aach allen Grund dezu, weil ess werrd unn werrd nitt warm. Unn dess soll de Wonnemonat soi?

Doodriwwer habb isch aach mett moim ahle Kummbeer Hubert geredd, der misch die vorsch Woch oogerufe hott weiler wisse wollt, wies uns su gieht.

No ja, halt wie die gons Zeit, habb isch gesaad, die Fraa unn isch, mir halle halt immer noch freiwillische Quarantäne, dess heeßt dehoom bleiwe unn oomol in de Woch zum Oikaafe gieh. Aach sinn merr zwaamol geimpft, unser Kinner aach, unn doo kann merr sich longsom druff oirischde, dass merr sich widder in de Arm numme kann. Aach kann merr sich druff freie, widder mol in e Werrtschaft ze gieh, was esse und drinke unn sich mett Freunde treffe. Unn du, Hubert, wie giehts dir?

Doo seet de Hubert: Ganz gut. Ja, lieber Hannes, mit den Freunden ist es so eine Sache, die sterben alle weg.

Koo Wunner bei unserm Alder, saach isch, awwer was will merr mache. Awwer was hälsde donn vunn dem Wedder, weils halt nitt warm werrd im Mai, im Wonnemonat Mai. Iwwerall werrd driwwer gebreweld.

Doo seet de Hubert: Hannes, das mag ja richtig sein. Aber es liegt halt daran, dass wir alle immer mehr und mehr verstädtert werden und den Kontakt zur Natur so langsam zu verlieren beginnen.

Wie moonsden dess?, habb isch enn gefroochd. Awwer recht hosde, aach isch verlier de Kontakt, weil isch nimmi su weit laafe kann unn die Fraa aach nitt

De Hubert druff: Ich meine damit, dass der Mai so sein muss wie er in diesem Jahr eben ist. Denk doch mal an die alten Bauernregeln, dort heißt es zum Beispiel: Mai kühl und nass füllt dem Bauern Scheun' und Fass. Oder eine andere: Mai trocken und warm macht den Bauern arm.

Isch habb misch omm Kobb gekratzt. Ja, Hubert, onn su ebbes denkt merr nitt. Dess kimmt awwer aach doodefoo, dass die Mensche jetzt, wo die Corona wenischer werrd, enaus wolle, meddem Fahrrad in de Wald odder mett de Kinner uff de Spillplatz – unn doodeferr missts halt doch e bissi wärmer soi, dass sich hiesetze kenne, um de Veschel noochzegugge odder e Picknick ze mache unn ...

De Hubert hott misch unnerbroche: Genau, Hannes, sie wollen was essen. Und das muss erst einmal wachsen, und es wächst in diesem Mai halt besser als in den heißen und trockenen Maimonaten, die wir in den letzten Jahren hatten.

Isch habb ins Telefon gegrinst. Also isses doch enn Wonnemonat?

De Hubert habb isch lache heern. Ja, vor allem insofern, als dass unsere Lebensmittel nicht zu teuer werden. Lieber Hannes, du weißt so gut wie ich, man kann nicht alles haben.

Isch grins weider: Doch, doch, getreu dem alde Spruch: Isch will nitt vill, isch will nor alles.

Eiern Honnes